



JUDICIAL SYSTEM MONITORING PROGRAMME PROGRAMA MONITORIZASAUN BA SISTEMA JUDISIÁRIU

Submissaun no Pareser JSMP kona-ba Proposta Lei Protesaun Labarik ba Parlamentu Nasional

Análize ba MSS nia ezbosu Lei kona-ba Protesaun Labarik (Proposta Lei No. /2016)

MSS nia Proposta Lei kona-ba Protesaun Labarik (Ezbosu Lei) pozitivu tebes tanba propoin enkuadramentu legál kona-ba kuidadu no protesauun ba labarik sira. Importante mós katak lei ida-ne'e tenke klaru, konsistente no realista, ho nune'e bele implementa ho efikás. Análize tuir mai ba Ezbosu Lei ne'e konsidera aplikasaun prátika ba dispozisaun balu no hamosu pergunta balu ba MSS no Parlamentu hodi hetan konsiderasaun no atensaun molok aprova Ezbosu Lei ne'e.

Preámbulu

Preámbulu ne'e deklara katak Ezbosu Lei ne'e prepara liuhosi konsulta ho organizasaun sosiedade sivíl sira ne'ebé envolvidu iha servisu sira protesauun labarik.

1. Favór esplika organizasaun sosiedade sivíl sira ne'ebé konsulta ona kona-ba Ezbosu Lei ne'e, no prosesu konsultasaun.

Entidade lokál sira ho responsabilidade ba kestaun sira ne'ebé relaciona ho labarik

Ezbosu Lei ne'e fó responsabilidade ba entidade lokál sira ba kestaun sira ne'ebé relaciona ho labarik no fó poder ba sira hodi halo intervensaun ba situasaun ne'ebé labarik sira iha risku, no obriga sira fó-hatene MSS bainhira labarik sira iha perigu (Artigu 4(1) no Artigu 8). Entidade hirak-ne'e bele inklui órgaun governamentál no naun-governamentál oioin – kualkér órgaun ne'ebé fornese servisu ba labarik. Ezbosu Lei ne'e la deskreve sirkunstánsia iha ne'ebé entidade hirak-ne'e bele halo intervensaun, ka natureza husi intervensaun ne'ebé sira bele halo.

2. Oinsá entidade lokál sira ne'ebé iha kontaktu ho labarik sei hetan informasaun no klarifikasaun kona-ba sira-nia poder no responsabilidade sira bazeia ba (Proposta) Lei ne'e?

Rede sira kona-ba Protesaun Labarik

Artigu 13 deklara katak tenke estabese rede protesauun labarik liuhosi diploma ministeriál konjuntu, iha kada munisípiu ka postu administrativu, no kompostu husi (bazeia ba Artigu 15):

- representante husi MSS na'in-2
- representante husi Edukasaun, Saúde, Servisu Rejistu no Notariadu, Juventude no Desportu, Formasaun Profisionál no Empregu na'in-1
- representante husi Komisaun Nasionál Direitu ba Labarik (KNDL) na'in-1
- representante husi instituisaun sira solidariedade sosiál nian ne'ebé fó apoiu ba labarik sira na'in 1 ka na'in-2
- representante husi PNTL na'in-1

- Representante sira husi entidade pública ka privada seluseluk, ka individu sira ho perísia ka esperiénsia profisionál kona-ba kestaun labarik nian ne'ebé hetan konvite husi rede

Rede nia responsabilidade no poder sira hatuur ona iha Artigu 16. Artigu 17 – 25 liga ho kestaun prosesuál no administrativa relasiona ho rede, hanesan obrigasaun atu entrega planu no relatóriu tin-tinan (Artigu 25), (Artigu 23) no mandatu (Artigu 20).

3. *Rede referál eziste ona iha kada munisípiu. Rede nia kompozisaun agora daudaun fleksivel no la presiza diploma ministeriál hodi estabelese rede ne'e. Agora iha problema tanba MSS, ne'ebé lidera rede ne'e, la organiza enkontru regulár.
Karik rede protesaun ba labarik bazeia ba Proposta Lei ne'e iha intensaun hodi formaliza rede referál ne'ebé eziste daudaun, ka hodi troka rede sira ne'ebé eziste ho sistema foun?
Oinsá MSS sei garante enkontru regulár no katak representante sira sei partisipa?*
4. *Lista representante sira iha Artigu 15(1) hamosu risku bele kria rede sira ne'ebé la relevante ba protesaun labarik iha área lokál – representante sira tenke mai husi entidade lokál ne'ebé serbisu ho labarik sira.*
5. *Ezbosu Lei ne'e hatuur katak kada rede lokál no MSS tenke asume tarefa administrativa barak liu duké sistema rede referál ne'ebé eziste daudaun, no presiza planu serbisu no relatóriu tinan-tinan, no manutensaun rejistu.
Realista ka lae, hodi ezije kada rede referál entrega planu serbisu no relatóriu tinan-tinan? MSS sei fó rekursu no finansiamentu ka lae, hodi fasilita ida-ne'e? Planu serbisu no relatóriu tinan-tinan iha objetivu saida de'it, no sé mak sei lee dokumentu hirak-ne'e?*

Komunikasaun Obrigatoria

Artigu 26(1) hatuur katak entidade sira ho responsabilidade ba kestaun relasiona ho labarik sira tenke fó-hatene Servisu Protesaun Labarik kona-ba “labarik sira ne'ebé iha perigu”.

6. *Ema ne'ebé serbisu ho labarik sira dala barak sujeitu ba devér konfidensialidade (n.e. doutór, advogadu). Bainhira obriga ema hirak-ne'e tenke relata kestaun sira ba Servisu Protesaun Labarik dala ruma signifika katak sira sei viola sira-nia devér konfidensialidade. Iha intensaun ka lae atu obriga ema hirak-ne'e hato'o informasaun, maski sira iha devér konfidensialidade?*

Artigu 26(2) hatuur katak ema ruma ne'ebé hatene katak labarik ida iha *perigu*, nia tenke informa Servisu Protesaun Labarik. Jurisdisaun barak hatuur katak ema no organizasaun sira ne'ebé serbisu ho labarik tenke hato'o informasaun (n.e. profesór, polisia, doutór) maibé la impoin obrigasaun luan hanesan ne'e ba ema hotu-hotu.

7. *Linguajen ne'ebé uza iha dispozisaun hirak-ne'e obriga ema atu hato'o informasaun, maibé la hatuur konsekuénsia bainhira la hato'o informasaun. Iha intensaun ka lae hodi fó pena bainhira ema la hato'o informasaun bazeia ba Artigu 26?*

Entidade lokál ho responsabilidade relasiona ho labarik sira iha obrigasaun atu hato'o informasaun bainhira deskonfia katak ema ruma halo krime hasoru labarik (Artigu 29). Informasaun hotu-hotu tenke fó ba Ministériu Públiku.

Ida-ne'e kria obrigasaun hodi relata krime ida, tanba ne'e iha possibilidade katak bainhira ema la hato'o informasaun kona-ba situaun ne'ebé constitui krime hasoru labarik, ema ne'e rasik bele komete krime bazeia ba Artigu 286 husi Kódigu Penál (naun-partisipasaun/ la relata krime). Nu'udar ezemplu, bainhira ema ruma husi rede referál la relata informasaun bainhira deskonfia iha abuzu fiziku hasoru labarik ida, signifika nia halo krime tanba la relata krime bazeia ba Kódigu Penál.

8. *Iha intensaun ka lae katak ema ne'ebé la relata krime ne'ebé deskonfia hasoru labarik tenke hetan akuzasaun ba krime tanba nia la relata krime bazeia ba Artigu 286 husi Kódigu Penál?*

Autorizasaun hodi halo intervensaun

Bazeia ba Artigu 10, intervensaun sira hodi proteje labarik sira ne'ebé iha risku ka perigu presiza autorizasaun husi:

- labarik, karik labarik ne'e iha tinan 12 ba leten
- no labarik nia inan-aman ka representante legál, ka tutór de facto (hanesan madrasta no padrastu de facto).

Bainhira labarik nia inan-aman ka representante legál ka tutór de facto la fó konsentimentu, tenke husu orden husi tribunál bazeia ba Artigu 11.

Iha exesaun iha situasaun emerjénsia bainhira iha “perigu atuál ka iminente ba labarik nia moris ka ofensa grave ba nia integridade fizika ka psikolójika” no laiha konsentimentu husi labarik nia inan-aman ka representante legál ka tutór de facto. Iha kazu ne'ebé laiha konsentimentu, Ministériu Públiku bele fó-sai instrusaun ba MSS no PNTL hodi hasai labarik husi situasaun ne'e no fó kuidadu saúde ne'ebé nesésáriu, inklui ezame médiku-legál. (Artigu 69)

Dispozisaun hirak-ne'e kontráriu ho dispozisaun sira ne'ebé eziste ona kona-ba autorizasaun iha kazu violénsia doméstika, bazeia ba *Lei Kontra Violénsia Doméstika (Lei Nú. 7/2010 (LKVD))*. Artigu 5 (Konsentimentu) husi LKVD hatuur katak:

- Intervensaun hodi fó apoiu ba joven vítima violénsia doméstika ho tinan 16 ba leten só presiza vítima nia konsentimentu.
- Intervensaun hodi fó apoiu ba labarik ho tinan 12 – 16 só presiza labarik nia konsentimentu, bainhira situasaun ne'e urjente no la bele hetan konsentimentu husi representante legál iha tempu adekuadu; ka bainhira representante legál mak ajente krime, no la bele hetan konsentimentu husi “entidade ne'ebé dezinada tuir lei” iha tempu adekuadu.

LKVD la hatuur katak tenke hetan konsentimentu husi tutór “de facto”, hanesan madrasta no padrastu informál (ne'ebé la formalmente adota labarik bazeia ba Kódigu Sivil).

Maski seidauk iha entidade ne'ebé dezinada tuir lei, MSS nu'udar entidade ne'ebé responsavel ba labarik sira-nia bein-estár LKVD espesifikamente mensiona MSS. PNTL mós iha obrigasaun sira bazeia ba LKVD hodi proteje vítima.

Ezemplu husi Ermera

Agora daudaun, difisil tebetebes – no iha kazu balu imposivel – ba MSS no PNTL atu foti asaun iha kazu ne'ebé labarik enfrenta risku sériu tebes atu sofre ofensa iha uma laran. Maski lei fó ona podér ba MSS no PNTL hodi halo intervensaun no proteje labarik sira. Kazu barak envolve madrasta no padrastu informál ne'ebé deskonfia nu'udar ajente krime.

Nu'udar ezemplu, iha kazu ida foin daudaun iha Ermera, labarik-mane ho tinan 2 hetan avaliasaun husi pesoál médiku ne'ebé observa katak nia sofre abuzu fiziku no maus-tratus ne'ebé sériu. Nia sofre abuzu ne'e durante períodu naruk, no iha probabilidade boot katak nia madrasta ka padrastu de facto, ka sira na'in-rua hotu, mak halo abuzu ne'e. Nia madrasta ka padrastu mak membru polisia. Kazu ne'e relata ona ba MSS, PNTL, PRADET no ALFeLa.

Maibé, MSS no PNTL entrega filafali labarik ne'e ba madrasta no padrastu, tanba labarik la bele identifika sé mak halo abuzu no laiha testemuña ne'ebé hakarak fó deklarasaun. Tuir loloos la bele entrega filafali labarik vítima ba situasaun perigoza hanesan ne'e, tanba iha ona evidénsia médika ne'ebé klaru kona-ba abuzu ba labarik. Labele espera katak labarik ho tinan 2 sei ko'alia no identifika sé mak halo abuzu.

Iha kazu ne'e, PNTL no MSS iha podér hodi hasai labarik ne'e husi situasaun perigoza, mézmuke laiha konsentimentu husi madrasta no padrastu tanba iha evidénsia katak sira mak halo abuzu no sira la'ós labarik nia tutór legál. Bazeia ba Ezbosu Lei ida ne'e kona-ba Protensaun Labarik, la bele hasai labarik ne'e

husi uma kuandu laiha instrusaun direta husi Ministériu Públika ka tribunál. Prosesu ne'e bele presiza loron hirak ka semana hirak, no durante tempu ne'e labarik bele hetan tan abuzu no intimidasaun/ameasa.

9. *Agora daudaun iha kazu VD, laiha rekizitu hodi hetan konsentimentu husi inan-aman, representante legál ka tutór de facto bainhira joven ne'e iha ona tinan 16. Ezbosu Lei muda pozisaun ida-ne'e. Iha ka lae intensaun atu halo mudansa ne'e?*
10. *Agora daudaun iha kazu VD, laiha rekizitu hodi hetan konsentimentu husi tutór de facto, hanesan madrasta no padrastu informál. Ezbosu Lei muda pozisaun ida-ne'e. Iha baze saida de'it ba mudansa ne'e, tanba kuidadu informál la rekoñesidu iha Kódigu Sivil?*
11. *Lei Kontra Violénsia Doméstika hatuur katak MSS no PNTL bele decide atu halo intervensaun iha kazu urjente bainhira deskonfia katak inan-aman mak halo violénsia doméstika, no tuir mai husu autorizasaun judisiál bazeia ba Kódigu Sivil. Ezbosu Lei muda pozisaun ida-ne'e. Iha intensaun ka lae hodi hetan konsekuénsia ida-ne'e?*
12. *Lei Kontra Violénsia Doméstika hatuur katak iha situasaun urjente no exesional, labarik ho tinan 12 ba leten bele fó nia konsentimentu rasik hodi permite intervensaun. Ezbosu Lei muda pozisaun ida-ne'e. Iha intensaun ka lae hodi hetan konsekuénsia ida-ne'e?*
13. *Oinsá Ministériu Públiku, MSS no PNTL garante katak kazu urjente hetan tratamentu loloos iha oras 48 nia laran, hodi garante katak la entrega filafali labarik sira ba situasaun ne'ebé abuzu akontese?*

Konsentimentu ba ezame médiku

Tuir Artigu 66, tenke iha konsentimentu husi labarik no nia inan-aman ka tutór hodi permite Servisu Protesaun Labarik lori labarik ida hodi halo ezame médiku. Hanesan mós ho intervensaun sira ne'ebé mensiona iha leten, iha exesaun iha situasaun emerjénsia, maibé lei hatuur katak pelumenus Ministériu Públika (karik la'ós tribunál) tenke fó-sai instrusaun ida hodi permite MSS ka PNTL lori labarik ne'e hodi halo ezame médiku (Artigu 69).

Dala ida tan, ida-ne'e la konsistente ho LKVD, ne'ebé hatuur katak PNTL tenke garante katak vítima VD simu atensaun médika ne'ebé imediatu. Hanesan deskreve iha leten, só presiza labarik nia konsentimentu bainhira labarik ne'e iha tinan 16 ba leten. Exesaun seluk mak bainhira labarik ho tinan 12 ba leten, no situasaun ne'e urjente no labele hetan autorizasaun husi representante legál iha tempu adekuadu; ka bainhira representante legál mak ajente krime, no labele hetan autorizasaun husi “entidade ne'ebé designada tuir lei” iha tempu adekuadu.

Agora daudaun, autorizasaun husi inan-aman la sempre nesesaríu ba labarik sira ho tinan 12 ba leten hodi halo ezame médiku-legál, ne'ebé konsistente ho LKVD. Ezame sira, ne'ebé PRADET halo, mak importante tebetebes hodi garante atensaun médika ne'ebé apropiadu ba labarik vítima, dokumentasaun ne'ebé efikás kona-ba kanek sira, no hodi halo prosesu kriminál ne'ebé efetivu ba kazu VD, no tenke halo kedas depoizde iha insidente abuzu. Karik Ezbosu Lei hatuur katak ezaminadór médiku ne'ebé akreditadu sempre presiza autorizasaun husi inan-aman molok halo ezame ba labarik ne'ebé seidak to'o tinan 17, ida-ne'e bele atraza ezame bainhira labele hetan inan ka aman, ka sira lakohi fó autorizasaun, tanba tenke hetan instrusaun ida husi tribunál ka Ministériu Públiku hodi permite ezame ba labarik ne'e.

14. *Lei Kontra Violénsia Doméstika hatuur katak MSS no PNTL bele decide hodi halo intervensaun iha kazu urjente no lori labarik ida hodi halo ezame médiku imediatu sein inan-aman nia konsentimentu, molok simu aprovasaun husi Ministériu Públiku ka tribunál sira. Ezbosu Lei muda pozisaun ne'e, ho nune'e presiza inan-aman nia konsentimentu, ka instrusaun ida husi Ministériu Públiku, molok bele halo ezame médiku ka tratamentu. Iha intensaun ka lae hodi hetan konsekuénsia ida-ne'e?*
15. *Oinsá Ministériu Públiku, MSS no PNTL garante katak kazu urjente sei hetan tratamentu apropiadu ho nune'e labarik sira simu atensaun medika imediata?*

Medida Protesaun – kuidadu institusionál

Ezbosu Lei deskreve medida protesauun lubuk ida, no fó preferénsia ba medida naun-institusionál. Artigu 39 hatuur katak instituisaun sira ne'ebé fó kuidadu ba labarik (*instituições de acolhimento*) tenke iha Memorandu-Entendimentu ho MSS. Artigu 40(3) hatuur katak instituisaun sira ne'ebé fó kuidadu ba labarik sira sei definidu iha lejislasaun própria.

Ezbosu lei kontein dispozisaun seluk ne'ebé regula no impoin obrigasaun sira ba instituisaun ne'ebé fó kuidadu ba labarik (Artigu 40, 41, 42 no 46). Agora daudaun, maioria husi instituisaun sira ne'ebé fó kuidadu ba labarik, inklui Fatin Hakmatek ba vítima sira ne'ebé sofre abuzu, orfanatu no pensaun, mak administra husi organizaun naun-governamentál. Ezbosu lei sei fó impaktu direitu ba instituisaun hirak-ne'e, no lejislasaun própria ne'ebé mensiona iha Artigu 40(3).

16. Oinsá progresu hodi prepara lejislasaun ne'ebé regula instituisaun sira ne'ebé fó kuidadu ba labarik? Lejislasaun ne'e prepara ona ka lae, no instituisaun sira hetan konsulta ka lae kona-ba konteúdu? Iha konsultasaun saida de'it ho instituisaun sira ne'ebé fó kuidadu ba labarik relasiona ho impaktu husi Ezbosu Lei ba sira? Tenke renova MoU ho MSS ho frekuénsia hira, no sé mak iha responsabilidade ba prosesu ne'e?

Artigu 41 hatuur katak instituisaun sira ne'ebé fó kuidadu ba labarik tenke iha ekipa téknika ne'ebé responsavel hodi avalia nesidade husi labarik sira ne'ebé hetan kuidadu, ne'ebé tenke inklui traballadór sosiál, psikólogo no profisionál seluseluk. Agora daudaun laiha traballadór sosiál (social worker) ho kualifikasaun formál, no iha psikólogo uitoan tebes iha Timor-Leste no iha kapasidade limitadu tebes hodi fó treinamentu ba traballadór sosiál ka psikólogo lokalmente. Tanba ne'e, iha probabilidade ki'ik iha kualkér instituisaun ne'ebé fó kuidadu ba labarik sira katak ekipa téknika sei inklui profisionál hirak-ne'e.

17. Realista ka lae hodi hatuur katak instituisaun sira tenke iha ekipa téknika ida-ne'e? Parlamentu ka MSS iha planu ka lae hodi hasa'e número traballadór sosiál treinadu no/ka psikólogo iha Timor-Leste, no planu ida hodi hasa'e finansiamentu ba instituisaun hodi sehu pesoál kualifikadu?

Artigu 42(2) hatuur katak órgaun sira tuir mai bele husu hodi vizita instituisaun sira ne'ebé fó kuidadu ba labarik sira: Juis, Ministériu Públiku, Provedoria Direitus Umanus no Justisa (PDHJ), Defensoria Públika, KNDL.

18. Instituisaun sira ne'ebé fó kuidadu ba labarik dala barak simu vítima sira ne'ebé envolvidu iha kazu legál ne'ebé prosesa daudaun. Oinsá MSS sei garante katak labarik sira la hetan trauma adisionál husu vizita no la divulga lokalizasaun husi instituisaun hirak-ne'e?

Artigu 94 hatuur katak tenke iha revizaun obrigatoría ba labarik sira-nia instituisaun ne'ebé simu sein desizaun judisiál anteriór. Artigu ne'e hatuur katak instituisaun ba labarik tenke fó-hatene Servisu Protesaun Labarik (MSS) kona-ba labarik sira ne'ebé simu ona, no Servisu Protesaun Labarik tenke halo revizaun no inisia prosesu hodi aplika medida protesauun. Importante atu responsabiliza loloos labarik hotu-hotu ne'ebé hela iha instituisaun, maibé importante mós atu respeita sira-nia direitu relasiona ho kualkér prosesu ne'ebé hala'o husi Servisu Protesaun Labarik.

19. MSS hatene ka lae tenke revee kazu hira, no iha ka lae rekursu espesializadu hodi halo revizaun ne'e? Oinsá MSS sei garante katak kualkér revizaun tenke hala'o ho sensibilidade hodi garante katak labarik sira la hetan trauma adisionál, no hodi proteje konfidensialidade no seguransa ba labarik sira ne'ebé agora daudaun hela iha instituisaun?

Medida Protesaun – idade ba maioridade

Artigu 51, 67 no 77 husi Ezbosu Lei hatuur katak medida protesauun sira remata, ka tribunál laiha tan jurisdisaun, bainhira labarik iha tinan 18. Maibé, definisaun sira iha Artigu 3 refere ba labarik ne'ebé

seidauk to'o tinan 17. Kódigu Sivíl hatuur katak idade maioridade mak tinan 17. Kuandu konsidera ema ho tinan 17 nu'udar adultu, parese laiha razaun atu kontinua medida protesaun to'o tinan 18.

20. Iha intensaun ka lae atu kria inkonsisténsia, tanba labarik nia tinan másimu mak 17, maibé medida protesaun remata bainhira labarik to'o tinan 18?

Prosesu Protesaun – kestaun prosesuál

Prosesu Reservadu

Artigu 67 hatuur katak prosesu ne'ebé relasiona ho protesaun labarik mak prosesu rezervadu.

21. Karik restrisaun ne'e garante audiénsia sira iha tribunál sei taka ba públiku?

Artigu 68 hatuur katak média labele identifika labarik sira, ka tranzmite sira-nia lian ka imajen. Iha possibilidade katak ema ka organizasaun ne'ebé la'ós média bele fahe informasaun kona-ba labarik sira ne'ebé iha perigu.

22. Karik artigu ne'ebé hatuur katak labele publika informasaun kona-ba labarik sira iha perigu, labarik sira ne'ebé envolvidu iha kualkér instánsia tribunál, ka labarik sira ne'ebé hetan medida protesaun, tenke aplika ba kualkér ema/organizasaun (la'ós média de'it)?

Protesaun sira ba labarik sira ne'ebé envolvidu iha prosesu

Artigu 80(1) hatuur katak labarik nia inan-aman ka representante legál tenke hetan advogadu ka husu nomeasaun defensor públiku. Artigu 80(2) hatuur katak labarik ho idade no maturidade suficiente bele husu tribunál atu nomeia defensor públiku. Iha prosesu protesaun, inan-aman nia interese no labarik nia interese la hanesan, no dala ruma presiza representante legál ne'ebé ketaketak iha kazu barak. Karik nomeia defensor públiku, inan-aman tenke iha representante ketak, no labarik tenke iha representante ketak. Defensor públiku ne'ebé nomeia hodi ajuda labarik sira tenke iha formasaun espesiál kona-ba serbisu ho labarik sira.

23. Defensoria Públika sei hetan ka lae rekursu sira hodi fô representasaun ketaketak ba labarik sira bainhira nesesáriu no formasaun espesiál kona-ba serbisu ho labarik sira? Advogadu sira ne'ebé la'ós defensor públiku bele ka lae representa labarik sira (n.e. advogadu sira ne'ebé agora daudaun serbisu ho labarik sira, hanesan ALFeLa)?

Komisaun interministeriál ba akompañamentu

Artigu 92 hatuur kona-ba estabesimentu komisaun ida hodi planeia implementasaun Ezbosu Lei no mensiona representante sira husi Ministériu balu. Artigu 92(3) hatuur katak komisaun bele inklui representante husi entidade públika ka privada ne'ebé halo traballu iha área labarik. Organizasaun naun-governamentál sira mak prinsipalmente envolvidu hodi fornese servisu ba labarik sira iha Timor-Leste no maneja instituisaun sira ne'ebé fô kuidadu ba labarik sira. Instituisaun sira ne'ebé fô kuidadu ba labarik sira direktamente afetadu husi Ezbosu Lei ida-ne'e. Organizasaun hirak-ne'e tenke iha biban hodi fô komentáriu ba komisaun implementasaun.

24. Representante husi ONG sira ne'ebé fornese servisu ba labarik sei hetan konvite ka lae hodi partisipa iha komisaun interministeriál ba akompañamentu? Sosiedade sivil bele ka lae fô submisaun ba komisaun ne'e?

Baze-dadus iha nivel nasionál

Artigu 97 hatuur katak MSS sei kria baze-dadus nasionál hodi rejista kazu hotu-hotu ne'ebé relata ba sira kona-ba labarik sira ne'ebé iha perigu. Baze-dadus bele ajuda hodi akompaña relatóriu no asaun ne'ebé

foti tiha ona, maibé sei kontein informasaun sensível ne'ebé tenke rai ho seguru no só bele uza ba objetivu limitadu.

25. Baze-dadus ne'e sei uza ba saida de'it? Oinsá MSS sei garante katak informasaun iha baze-dadus ne'e seguru no uza de'it ba objetivu loloos?

Servisu atendimentu telefóniku

Artigu 98 hatuur kona-ba estabesimentu servisu atendimentu telefóniku ne'ebé gratuitu hodi garante reasaun lailais ba situasaun labarik iha perigu. Servisu telefóniku sei presiza pesoál konstante no rekursu dedikadu. Envezde estabelese servisu telefóniku ne'e tuir lei, bele koko de'it sein presiza lejizlasaun. Servisu telefóniku mós servisu ne'ebé atu hanesan, tuir Lei Kontra Violénsia Doméstika (Artigu 20(2)), ne'ebé seidak estabesidu tinan 7 depoizde promulga lei refere.

26. Servisu telefóniku ne'e sei responde ka lae ba nesesidade partikulár ne'ebé identifika ona relasiona ho protesaun labarik? Karik la responde, karik bele kombina servisu ne'e ho servisu ne'ebé mensiona iha LKVD, ne'ebé seidak estabesidu?